


բիոն հագած . կրունկներն իրար կողքի և ոտների ծայրերն հակառակ ուղղութեամբ : Քրիստոսի գլխի մագերը երկու ուրբուն և երկար կաւիկներով իջնում են ուսերից էլ շատ ցած . անդամներն ոչ մի կարկամունք կամ ցաւի արտայայտութիւն, որ ենթադրել է տալիս, թէ առնուած է մի նախնական օրինակից : Խաչեցեալի երկու կողմից ծունկ են չոքած, գլուխներն ու դէմ-



Պատկ. 48 Լուս. Պրոֆ. Օրբելիի Խաչարձանի Սեւանում, 1653 թ.

քերը վեր բարձրացրած՝ աղաչաւորի դիրքով՝ երկու ֆիգուր, որ անշուշտ Յովսէփ և Նիկիդիմոսն են, և ոչ երկու կանայք, ինչպէս նկարագրել էր մեզ հանգուցեալ Կիւտ եպիսկոպոսը :

Խաչելութեան տակ աւերումն դժոխոց . Յիսուս դարձեալ երկար կաւիկներով, սրածայր մորուքով, գօտէկապ երկար պարեգօտով, ոտքերի տակ «դրունք դժոխոց», աջով բռնել է Ադամի ձեռքը . վերջինս էլ իւր հերթին բռնել է Եւայի ձեռքը : Յիսուս ձախով խաչագլուխ գաւազան ունի, ներքեի ծայրը նիղակաձև, որ խրել է գալա-

րուած վիշապի բերանը . նման մի վիշապ էլ աջ կողմից : Աւելի բարձր՝ Յիսուսի աջ կողմից խաղողի ողկոյններով կենաց ծառն է և դորանից էլ բարձր արձանագրութեան տակ՝ Ամենակալն է, նստած չորեքկերպեան աթոռի վերայ, որի նշանակների դասաւորութիւնը աւետարանների կարգով չէ, այլ վերին շարքում մարդ և արծիւ, ներքևում առիւծ և եղ : Ամենակալը դուռ արեւելեան զգեստաւորութեամբ, այսինքն երկար պարեգօտի վերայ հագել է աբայ . գլխի մազերը երկար կաւիկներով իջնում են ուսերից կրծքի վերայ, թաւ, սրածայր մորուքով, աջով խաչակնքում է, ձախը կրծքին դրել : Նորա տակ մի քառանկիւնու մէջ Աստուածածինն է, Յիսուս մանկանը խանձարուրքի մէջ պատած՝ գրկել է ոչ սովորական ձևով, այլ կիսահորիզոնական ուղղութեամբ, որի նման մի օրինակն էլ ունինք Հաղբատում, Սմբատի որդի Քրդի յիշատակին, եղբայր տեառն Բարսղի, Սմբատ և Ուքան որդիների կողմից Ոկթ = 1200 թուին կանգնած խաչքարի վերայ : Նորա տակ եղած առանձին քառանկիւնու մէջ երկու կենդանիների՝ եղ և էջ՝ պատկերագրութիւնն է, հաստատ ապացոյց, որ Տրդատը կամեցել է ծննդեան տեսարանը ներկայացնել :

Սրանից էլ ցած երեք թագազարդ ֆիգուրներ կանգնած են իրար կողքի, ձեռքերն աղօթաւորի ձևով բռնած, ափերը դէպի դուրս, որ մինչև այժմ էլ մնացել է Հայոց եկեղեցու մէջ նորընծայ ձեռնադրուողների համար, երբ բեմի վերայ ծունկ չոքած, երեսները դարձնում են դէպի ժողովուրդը : Առաջին միտքը, որ ծագել կարող է, նրանց նոյնացումն է մոզերի հետ, բայց դրանք արդարների դասն են վերջին դատաստանի տեսարանի հետ կապուած, իբրև խաչարձանի ձախ կողմի պատկերագրութեան մաս, ապա թէ ոչ նրանց բերած ընծաները մատնանշած կ'լինէր արուեստագետը : Յիրաւի հակադիր կողմից՝ վերից վար վերջին դատաստանն է պատկերաւորած . ամենից բարձր Յիսուսի գլուխն է, աջից և ձախից արեգակն ու լուսինը, իսկ սրանց տակը չորս հրեշտակներ, փողերը բերաններին : Ապա սրանց տակը քառանկիւնու մէջ՝ մեղքի և արդարութեան կշիռքն է . սատանաներից մէկը մէջքով բարձրացնում է մի թաթը, իսկ միւսը փայտով